

REGIONAL NEWS

PROJECT BRAMHASTRA

Larsap Gen Vijay Kumar Singh-a'n ruihhlo in tualchhungah bu a khuar hneh hle tawh nia a hriat thu sawiin ruihhlo do turin mitin tanrual a pawimawh a ti.

Mizoram chu ruihhloin a hneh theih loh State ti a khawvel hriat leh hmuh theiha pho chhuah tum tura theihtawp chhuah a tul thu a sawi. Thalaite an fihlim theih nana WATO Trust hmalakna, 'Project Bramhastra' kaltlanga 'Football Exhibition Match - Awareness Campaign Against Narco-terrorism' a hmanpui na ah he thu hi sawiin Larsap chuan WATO Trust hmalakna Project Bramhastra hnuai sports hmanga ruihhlo dona campaign hrang hrang Mizorama kalpui a ni chu lawmawm a tih thu sawiin, 'Vasudhaiva Katumbakam' tih hmanga Founder & President Dr. Yogita Karache leh a thawhpuite inpekna chu a fakawm hle ani,ati. Khawvel hmasawn zelah buainate pawh khirh chho zelin thangtharte tana hlauhawm tak ruihhloin Mizoram pawh a rawn run nasa telh telh tih tarlangin, ruihhlo chuan muang changin, thawm dim takin taksa, ngaihtuahna leh thlarau nun thlengin a khawih chhe hret hret thin a; chhungkua, khawtlang leh ram pum runin a ei chhe mek zel a ni, a ti bawk.

<><><>

CCM

Nimin khan Council of Churches in Mizoram (CCM) buatsaihin Khawzawl Vengthar Presbyterian Kohhran Golden Jubilee Hall-ah seminar vawi 8-na buatsaih a ni a, he hunah hian CCM member kohhrante aʔangin palai 71 an kalkhâwm a ni.

Seminar tum riat (8)na hi CCM President Rev Dr R. Lalbiakliana'n a kaihruai a, General Secretary Rev. Dr. Lalhmangaiha ziah, "CCM lo pianchhuah dan leh hmalam thlirna" tih zirho a ni.

Chawhnu lamah Khawzawl Vengthar Bialtu Pastor Rev R.Lalthlengliana'n Seminar hi a kaihruai a. Group 4-ah inthenin, sawiho tur thupui- pahnih - CCM hi kohhran mipuiten kan hriat tlan theih nan eng programme nge siam thin ila ʔa ang? tih leh CCM in Project in ang thlang neih tur atana ʔa engtege ni ang? tihte sawiho a ni.

CCM-ah hian kohhran pawl 9 Mizoram Presbyterian kohhran, Evangelical Church of Maraland, Evangelical Church of India, Independent Church of India, Isua Krista Kohhran Bualpui Ng, Lairam Isua Krista Baptist kohhran, Mizoram Baptist Kohhran, Wesleyan Methodist Church leh Zomi Baptist Church te an tel ani.

<><><>

PROJECTS

Tourism leh Sports changtu minister Pu Lalnghinglova Hmar chuan a department chan hrang hrang hnuaiah Champhai District hmasawmna turin cheng vaibechhe 96 leh nuai 38 chuang hu hmalakna a awm mek thu a sawi.

Nimin chawhnu khan Pu Lalnghinglova Hmar hian Champhai Circuit House ah a department chan hrang hrang hmalakna Champhai chanchinbu mite a hrihfiah a.Tourism hnuai hmalakna tur hmun hrang hrangte endik a nih tawh thu leh PRASHAD scheme hnuai Vangchhia a project hmalakna leh hmathlir te, Sports & Youth Services hnuai Chhangphut Field leh New

Champhai Field-a hmalakna chungchang te, LESDE leh Excise & Narcotics hnuai hmalakna hrang hrang te a sawifiah a. Ram pum huapa hmalakna thar, Sardar Vallabhai Patel-a hriatreng nana Sardar@150 Unity March a tlangzarh nghal bawk.

Nimin chawhma lam khan Pu Lalnghinglova Hmar hian Champhaia a department chan hrang hrang hnuai hnathawh te a endik a, Champhai Vengsanga Heritage and Cultural Centre te, Keilungliaha Eco Resort Experience neihna turte leh New Champhaia football ground chei thar turte a hmunah kalin a endik a. Champhai District ah zinmite hipna lama thil tih theih tam tak a awm tih sawiin heng ruahmanna hi district dang tana entawn tlak khawpa siam a tum thu leh khelmual awm sate chu thalaite tana hmasawna thlentuh leh inkhelmi siamchhuaktu a nih ngei a rin thu a sawi bawk a ni.

Minister hi Adviser to CM Pu TBC Lalvenchhunga, Commissioner, MKVI Board chairman Pu C. Lalremliana, Tourism department director Pi R. Lalrodingi leh Dy. Director, LESDE Pu Zothankhuma te'n an tawiawm a ni.

<><><>

ORDER FENCING

Chakma Autonomous District Council (CADC) a BJP hruaitute chuan tun hnai khan Bangladesh rami hung avanga an ram chantute zangnadawmna pe thuai turin central sorkar an nawr.

CADC BJP district president Pu Durjya Dhan Chakma leh hruaitu dangte hian Ministry of Home Affairs a Border Management Secretary Dr. Rajendra Kumar chu Delhi a a pisa-ah an hmu a. Bangladesh ramri hungna a ram laksakte, kumin February ni 17-a Gauhati High Court-in thla 3 chhunga pe tura thu a pek hnu pawha ramri hung hna thawktu National Projects Construction Corporation (NPCC)-in tun thlenga a la pe lo chu an lungawi loh thu an thlen ani. Bangladesh ramri hung avanga zangnadawmna pek tura High Court-in a tih chu cheng vaibelchhe 31 leh nuai 99 chuang bakah a pung nen a ni a. Lawngtlai district bawrhsapin a pung nena zangnadawmna pek chhuah zat tur a chhut chhuah chu cheng vaibelchhe 90 leh nuai 95 chuang a ni.

High Court-in thutlukna a siam hnu leh Lawngtlai district bawrhsapin court thu anga pawisa pe tura a tih hnu-ah pawh NPCC hian tun thlengin an la pe duh lo ni a sawiin hei hian a tuartu chhungkaw 576-te tan harsatna namen lo a siamsak a ni, an ti a. Border Management Secretary chuan lo zir chianga chak taka a lo bawhzui tur thu a sawi niin Pu DD Chakma chuan a sawi a ni.

<><><>